

La Bulgaria renunzia ad eriger ina centrala nucleara

■ **(gsc) In reactiv nuclear da Penly (Normandia), sper il Chanal da la mongia, ha pers aua radioactiva dals 4 enfin als 6 d'avrigl.** Ins ha reparà la sfessa, ma ins n'ha betg sclerì il motiv da l'accident. En mintga cas fa'l endamen ils privels chaschunads da l'atom; ma la Frantscha resta tar l'energia nucleara, era sche ses pievel elegia da matg in president socialist. En la Peninsla dal Balcan èn ins qua pli curaschus: Ils 5 d'avrigl èn ins vegnì da savair che la Bulgaria (7,5 milliuns olmas) haja gist renunzià ad eriger ina centrala nucleara a Belene, a vest da Ruse, citad nativa

dal scriptur Elias Canetti (1905–1994). Co èsi vegnì a lezza renunzia?

In project dispitaivel

Dapi 1974 funcziuna gia ina centrala nucleara en Bulgaria. Ella è situada sper il Danubi, a Cosloduj, a vest da Belene. «Ils quatter blocs ils pli vegls han ins mess ord funcziun 2002 e 2006, sunter ina cunvegna cun l'Uniun europeica. Ils blocs nr. 5 e 6 han ins modernisà e transformà per augmentar la segirtad (...) Per substituir quels che na funcziunan betg pli, vul ins eriger ina segunda centrala

nucleara a Belene» (1). Uschia in'ovra da consultaziun da 2011. Ma «la regenza bulgara ha annunzià uffizialmain, ils 28 da mars 2012, ch'ella renunzieschia al project dispitaivel da centrala nucleara a Belene» (2). In motiv è segir che la construcziun, finanziada per gronda part da Moscau, avess anc augmentà la dependenza bulgara areguard la Russia: «2010 han Bulgaria e Russia suttascriu a Varna ina cunvegna da basa davart 'South Stream', conduct da gas natiral sut il Mar nair planisà tranter ils dus pajais» (3). La Bulgaria dependa quasi tuttafatg dal gas russ e per 80% dal petroli russ. Era ter-

ratrembels en la regiun da Belene han dà da patratgar. La citad è situada sper il Danubi, a 100 km en lingia directa da Bucuresti, chapitala da Rumunia cun strusch dus milliuns olmas; perquai han impurtantas gasettas rumenas («Cotidianul», «România Libera» e «Ziarul»), sco era «Greenpeace Romania», fatg campagna cunter il project: «Nu centralei nucleare Belene! Prima actiune Greenpeace în Bulgaria pentru energie curata si sigura» («Na a la centrala nucleara da Belene! Emprima acziun da Greenpeace en Bulgaria per in'energia schubra e segira.»)